

Die Merckzeichen darbey man güte des Honigs
soll erkennen.

In guter ernsthafter Haußvatter sihet allwegen/wie er alles dasjenige/welches ihm dienstlich vnd nützlich vermeinet zusyn/seine Haußhaltung damit zu bessern/zu gutem nutz möge bringen. Nun raag ich wol abermals bey der Warheit sagen/das sichs in der Haußhaltung wenig finden wirt/welches ein grössere nutzbarkeit möchte bringen/als eben das Honigwerck/Denn man sihet/was doch die Spanier für eine vnsägliche Rauffmanschaft mit dem Honig treiben/dieweil sie von wegen der manigfaltigen vnd grosser vngelegenheit ihres Landes/kein ander bequemere Gewerb mögen treiben/dardurch sie sich bereichern / vnd zu grossem Gelt vnd Gut mögen kommen/denn allein durch das blosser Honigsgewerb. Darumb legen sie sich erstlich darauff / vnd sehen / wie sie nur mächtige Summa Honigs mögen zusammen bringen : Desgleichen thuns auch die Böcker/so vmb Narbona sich halten / welche vns des besten / schönesten vnd weissesten Honigs/ zu vnserer täglichen Notturfft hauffenweisz zuschicken. Darumb wil ich den jenigen/welche mit Honig ihre beste handlung wollen haben/ rahten/ das sie sich sonsten auff keinen andern/denn auff den allerbesten Honig legen: denn die fruchtbarsten vnd aller geschlachtesten Immen/seyn eben mit dem kosten vnd mit gleicher mühe vnd arbeit außzuhalten/als sonst die aller ärgsten/vnd welche ganz vntüchtig seyn.

Die Merckzeichen darbey man gut Honig sol erkennen/seyn diese nachfolgende : Das beste Honig solle Goldfarb/eines holdseligen lieblichen geruchs/klar vnd lauter / pur vnd durchsichtig/süß vnd wolgeschmackt seyn/ vnd gleichwol hiemit eine liebliche schärffe haben/ sol weder zu dicke noch zu dünne/sonder einer mittelmässigen Consistenz vnd wesens seyn : Wenn mans vbersicht mit einem Finger zeucht / sol es gleichsam gerader vnd stärker Linienweisz / bey einander bleiben/ vnd gar nicht von einander enswen brechen: Denn wenn es enswen reißt / so ist es eine anzeigung/

- das der Hanig entweder zu dick/oder zu dünne/ oder aber vngleicher vermischung ist. Ein guter Honig sol nicht lang bey dem Feuer kochen/vnd wenn er siedet/ sol er keinen grossen schaum von sich geben. Ein solcher guter Honig sol für allen dingen nicht zu stark nach Thimian schmecken/oder riechen/vnangesehen/das ich wol weisz/das irer viel solchen Honig für den besten/thewer vnd werd halten. Der Honig welcher in dem Frühling vnd Sommer ober gesämet wirt / ist allwegen viel besser/denn welcher im Winter geschnitten wirt.

Der weisse Honig ist nicht sonders viel geringer an seiner güte/denn der Goldfarbe/ allein/das er die andere gute Merckzeichen darbey auch habe. Also ist der Spanische vnd welcher auß Narbona zu vns kompt/ gestalt/ denn er ist Schneeweisz/zimlich hart / vnd dick / dißfalls vbertriffet er auch bey weitem allen andern Honig: Je frischer Honig/ je besser er auch ist / diß falls ist er dem Wein ganz entgegen/denn die alten Wein seyn allwegen für trefflicher gehalten/denn die neuen. Das soltu am Honig mercken vnd wissen / das wie allwegen mitten im Fasz der beste Wein/ vnd oben auff der Sonnen das köstlichste Del: Also ist der herrlichste Honig unten am Boden: Denn je dicker vnd schwerer Honig ist/ je besser er auch vnd trefflich süß ist.

Der Honig ist zu vielen herrlichen dingen gut/vnd sehr notwendig: Er erstreckt vnd erlängert den alten Leuten/vnd solchen Personen/welche kalter Complexion vnd Natur seyn/ ihr Leben das aber dem also seye/ist leichtlich an dem abzunemen/dieweil wir sehen/das die Bienen/vnangesehen/das sie doch ein kleines/blödes vnd schwaches Thierlein seyn / gleichwol biß in die neun oder zehen Jar lang leben / dieweil sie des Honigs allein geniessen. Des Honigs Natur vnd Eigenschaft ist/ alle ding frisch vnd ganz für der fäulung zu behalten: Darumb pflegt man in den offenen vnd faulen Mundschäden/ ein Burgelwasser auß Honig zu machen/ den Mund darauß zu schwencken/vnd also dieselbigen darmit zu säubern.

Auß Honig pflegt man ein Wasser zu distillieren/dasselbige macht das aufffallende Haar widerumb wachsen/es sey an welchem ort des Leibs es wolle.

Das eylffte Capitel.

Weiß vnd gestalt/allerhand frucht vnd andere ding
mit Honig einzumachen/vnd zubereiten.

Honig